



DIE XI FEBRUARII

(d. p. in Diac. Pampilon.)

IN FESTO S. TITI EPISCOPI ET CONFESSORIS

DUPLEX

*Omnia de communi Confessoris Pontificis præter
sequentia.*

ORATIO.

Deus, qui beatum Titum Confessorem tuum atque Pontificem apostolicis virtutibus decorasti; ejus meritis et intercessione concede, ut juste et pie viventes in hoc sæculo, ad cœlestem patriam pervenire mereamur. Per Dominum Nostrum Jesum etc.

Ll. 1. N. de Sra. occurrente: in Quadrages. FIDELIS SERMO....de cni.

IN II NOCTURNO.

LECTIO IV.

Titum Cretensium Episcopum vix Pauli Apostoli verbo christianæ fidei sacramentis, mysteriisque excultum, ea sanctitatis luce Ecclesiæ tunc vagienti effulsisse comper-
tum est, ut inter ejusdem Doctoris gentium discipulos

meruerit cooptari. Adscitus in partem oneris prædicationis, adeo evangelizandi ardore, et fidelitate Paulo extitit charus, uti pse cum venisset Troadem propter Evangelium Christi testatus sit, non habuisse requiem spiritui suo, eo quod Titum fratrem suum ibi non invenerit. Et paulo post Macedoniam petens, rursus suam in eum charitatem ita exprimit: sed qui consolatur humiles, consolatus est nos Deus in adventu Titi.

ñ. Inveni David servum meum, oleo sancto meo unxi eum: * Manus enim mea auxiliabitur ei.—ÿ. Nihil proficiet inimicus in eo, et filius iniquitatis non nocebit ei.— Manus enim mea auxiliabitur ei.

LECTIO V.

Quamobrem Corinthum ab Apostolo missus, ea sapientia; et lenitate legationis hujus munere functus est, quæ præsertim de Fidelium pietate eleemosynas colligendas ad sublevandam Ecclesiæ Hebræorum inopiam spectabat ut Corinthios, non solum in Christi fide continuerit, sed etiam desiderium, fletum, æmulationem inter eos pro Paulo, qui illos primus instituit, excitaverit. Ad effundendum interim inter gentes linguis, locisque distinctas divini verbi semen pluribus terra, marique itineribus relictis, magnaque animi firmitate pro Crucis trophæo curis laboribusque exantlatis, una cum duce Paulo Cretæ insulam appulit. Cum porro huic Ecclesiæ Episcopus ab ipso Apostolo delectus esset, dubitandum non est, quin in eo munere ita versatus sit, ut juxta ipsius Pauli præceptoris monita, seipsum præbuerit exemplum honorum operum in doctrina, in integritate, in gravitate.

ñ. Posui adjutorium super potentem, et exaltavi electum de plebe mea: * Manus enim mea auxiliabitur ei.—ÿ. Inveni David servum meum, oleo sancto meo unxi eum.—Manus.

LECTIO VI.

Itaque tanquam lucerna inter eos, qui in idolatriæ et mendaciorum tenebris, veluti in umbra mortis, sedebant religionis jubar diffudit. Traditur eum inter Dalmatas, ut Crucis vexillum explicaret, strenue consudasse. Tandem meritorum et dierum plenus quarto supra nonagesimum anno pridie nonas januarii pretiosa justorum morte obdormivit in Domino et sepultus est in Ecclesia, ubi ab Apostolo Minister fuerat constitutus. Hujus nomen à Sancto Joanne Chrysostomo et à Sancto Hieronymo præcipue commendatum, Martyrologio romano eadem die inscriptum legitur; verum pro ejus die festo cum officio et Missa in catholico Orbe recolendo ab utroque Clero, primam insequentem diem liberam Summus Pontifex Pius Nonus assignavit.

ñ. Iste est, qui ante Deum magnas virtutes operatus est, et omnis terra doctrina ejus repleta est. * Ipse intercedat pro peccatis omnium populorum.—ÿ. Iste est, qui contempsit vitam mundi, et pervenit ad cœlestia regna.—Ipse intercedat.—Gloria Patri.—Ipse intercedat.

IN III NOCTURNO.

Lectiones de Homilia Sancti Gregorii Papæ in Evangelium Designavit Dominus de Communi Evangelistarum, cum ññ. de Communi Confessorum Pontificum.

In Missa Statuit Oratio et Evangelium ut in Officio.

DECRETUM.

URBIS ET ORBIS.—Suprascriptas Lectiones proprias alias à Sacrorum Rituum Congregatione adprobatas cum ora-

tionem in honorem Sancti Tili, Episcopi Confessoris, Sanctissimus Dominus Noster Pius IX, Pontifex Maximus, addendas indulsit Officio et Missæ de Communi Confessorum Pontificum de eodem Sancto Episcopo Confessore, cujus festum sub ritu duplici minori recolendum mandavit hac ipsa die in universa Ecclesia die prima quæ libera vacasset post pridie Nonas januarii; servatis Rubricis. Quibuscumque in contrarium disponentibus minime obstantibus. Die 18 maji 1854.—J. CARD. ANTONELLI;=Dominicus Gigli, S. R. C. Secretarius.

Pamplona · Imp. de F. Erasun. = 1856.

